

7. gr.

Vörur, sem innihalda eiturefni eða hættuleg efni og boðnar eru til sölu en eru vanmerktar, skulu merktar samkvæmt ákvæðum íslenskra reglna.

8. gr.

Ef boðnar eru til sölu eða notkunar vörur, sem reglur þessar taka til, og ílát þeirra eru vanmerkt, skal heilbrigðiseftirlit stöðva sölu þeirra og sjá til þess að framleiðandi eða innflytjandi merki vöruna. Að öðrum kosti skal henni fargað á viðeigandi hátt í samræmi við lög um eiturefni og hættuleg efni og reglugerðir þar að lútandi.

9. gr.

Heilbrigðisnefndir undir yfirumsjón Hollustuverndar ríkisins hafa eftirlit með framkvæmd þessarar auglýsingar.

10. gr.

Hollustuvernd ríkisins er heimilt að veita tímabundnar undanþágur í allt að 6 mánuði frá auglýsingu þessari til þess að koma á fullnægjandi merkingum. Áður en slík undanþága er veitt skal framleiðandi eða innflytjandi leggja fram áætlanir um fullnægjandi merkingar.

11. gr.

Auglýsing þessi, sem birt er með stoð í 6. gr. laga nr. 24/1936 um eftirlit með matvælum og öðrum neyslu- og nauðsynjavörum sbr. og lög nr. 85/1968 um eiturefni og hættuleg efni og lög nr. 109/1984 um hollustuhætti og heilbrigðiseftirlit, öðlast gildi þegar í stað hlutaðeigandi til eftirbreytni.

Heilbrigðis- og tryggingamálaráðuneytið, 28. febrúar 1985.

Matthías Bjarnason.

Ingimar Sigurðsson.

14. mars 1985

REGLUGERÐ

Nr. 148

um búfjárhald á Siglufirði.

1. gr.

Tilgangur reglugerðar þessarar er að stemma stigu við óhóflegu búfjárhaldi innan lögsagnarumdæmis Siglufjarðar og tryggja að gróðurlendi bæjarins verði ekki spillt.

2. gr.

Búfjárhald (sauðfjár, hrossa, nautgripa, svína, geita og alifugla) er óheimil utan lögbýla innan lögsagnarumdæmis Siglufjarðar, nema með sérstöku leyfi bæjarstjórnar. Þó er reiðhestahald undanþegið ákvæðum reglugerðar þessarar, ef það er á vegum hestamannafélaga og þau hafa sett um það reglur sem bæjarstjórn staðfestir eftir gildistöku hennar.

3. gr.

Sá sem hyggst sækja um leyfi samkvæmt 2. gr. skal senda um það umsókn til bæjarráðs. Í umsókninni skal gera grein fyrir fjölda þess búfjár sem óskað er leyfis fyrir, hvernig geymslu þess skuli háttað og öðru er máli skiptir fyrir öryggi þess og aðhald. Leyfisveiting er háð því að umsækjandi sé félagi í búfjáreigendafélagi, ef slíkt félag er starfandi og skal vottorð þess efnis þá fylgja umsókn.

4. gr.

Telji bæjarstjórn að skilyrði til búfjárhalds séu fyrir hendi, skal hún veita leyfið og skal það bundið við tiltekinn hámarksfjölda. Leyfið er veitt til óákveðins tíma, en er uppsegjanlegt með eins árs fyrirvara miðað við 1. júní ár hvert. Leyfið er háð gildandi reglugerð um búfjárhald á hverjum tíma, það skal gefið út á nafn og skal ekki vera framseljanlegt.

Ef leyfishafi brýtur reglur um meðferð búfjár, t. d. með því að gæta ekki fjárins á fullnægjandi hátt, má afturkalla leyfið að undangenginni aðvörun.

5. gr.

Ef maður heldur búfé án heimildar samkvæmt reglugerð þessari, skal lögreglan hlutast til um að það sé tekið úr vörslu hans. Heimilt er að selja það búfé á opinberu uppboði eða slátra því að undangenginni aðvörun. Hið sama gildir ef leyfishafi gætir ekki settra reglna um meðferð búfjárins, þannig að það veldur tjóni eða óþrifum. Eiganda búfjár ber að greiða allan kostnað sem leiða kann af slíkum ágangi.

6. gr.

Bæjarstjórn getur ákveðið að greitt skuli gjald fyrir veitt leyfi til búfjárhalds.

Fordagæslumenn skulu gæta þess að fjöldi búfjár sé í samræmi við veitta heimild hverju sinni.

7. gr.

Bæjarstjórn skal hafa búfjárhelda girðingu umhverfis íbúðabyggð í bænum og skipuleggja landsvæði fyrir búfjárhald utan hennar. Stefnt skal fljótt og skipulega að því að allt búfjárhald flytjist út fyrir ofangreinda girðingu.

8. gr.

Byggingar peningshúsa skulu aðeins leyfðar í skipulögðum búfjársvæðum sem bundin eru í aðalskipulagi.

9. gr.

Brot gegn ákvæðum reglugerðar þessarar skulu varða sektum, allt að kr. 5 000,00. Upphæð þessi skal breytast í samræmi við þær breytingar sem verða kunna á vísitölu byggingarkostnaðar.

10. gr.

Allir þeir, sem við gildistöku reglugerðar þessarar eiga eða hafa í umsjá sinni búfé er fellur undir ákvæði hennar, skulu innan sex mánaða frá gildistöku hennar hafa tilkynnt um búfjárhald sitt og sótt um leyfi, ella fellur niður heimild þeirra til að halda búfé.

Reglugerð þessi, sem er samin og samþykkt af bæjarstjórn Siglufjarðar, staðfestist hér með samkvæmt lögum nr. 44 23. maí 1964 um búfjárhald í kaupstöðum og kaupsýslum til þess að öðlast gildi þegar í stað.

Félagsmálaráðuneytið, 14. mars 1985.

F. h. r.

Hallgrímur Dalberg.

Hólmfríður Snæbjörnsdóttir.